



الجامعة الإسلامية في ماليزيا  
UNIVERSITI MALAYSIA PAHANG  
AL-SULTAN ABDULLAH

# News





[General](#)

## **UMPSA lancar Program Kesedaran Teknologi Kecerdasan Buatan (AI) Peringkat Universiti 2024**

22 November 2024

PEKAN, 22 November 2024 - Universiti Malaysia Pahang Al-Sultan Abdullah (UMPSA) lancar Program Kesedaran Teknologi Kecerdasan Buatan (AI) Peringkat Universiti bagi tahun 2024 di Auditorium Perpustakaan UMPSA, Pekan.

Majlis Perasmian telah disempurnakan oleh Penolong Naib Canselor Pusat Jaringan Industri dan Masyarakat (PJIM), Profesor Datin Ts. Dr. Mimi Sakinah Abdul Munaim mewakili Yang Menjalankan Fungsi Naib Canselor, Profesor Ts. Dr. Aida Mustapha.



Menurutnya, program ini dianjurkan dengan beberapa objektif khusus, yang mampu memberikan impak besar kepada para peserta.

“Dengan perkembangan pesat teknologi AI, kita perlu memastikan bahawa kita sentiasa peka dan bersedia untuk memanfaatkan potensi teknologi ini dalam kehidupan seharian dengan beretika dan penuh integrity.

“Pelaksanaan program ini adalah selari dengan inisiatif UMPSA ketika ini sebagai sebuah kampus pintar (*Smart Campus*) seiring dengan saranan kerajaan dalam memperkasakan agenda kerajaan digital di negara ini.

“Program ini juga bertujuan untuk memupuk semangat kerjasama serta memperkukuh jaringan, terutamanya antara pihak industri dan akademik, bagi memastikan kita dapat bergerak seiring dengan kemajuan teknologi,” ujarnya.

Tambahnya lagi, ini sekali gus bertujuan untuk menjamin kita agar tidak ketinggalan dalam usaha pembangunan negara, khususnya dalam membangunkan modal insan.

“Melalui aktiviti-aktiviti yang dirancang seperti pameran, pertandingan, dan bengkel, program ini juga diharap dapat mencetuskan minat dan semangat terhadap teknologi serta inovasi dalam kalangan para peserta yang terdiri daripada pelajar sekolah, institusi pendidikan tinggi dan warga UMPSA sendiri,” katanya.

Turut diadakan hari ini adalah sesi perkongsian ilmu daripada pensyarah Fakulti Komputeran (FK), Ts. Aziman Abdullah dan Pengarah Urusan Kanaz Holdings Sdn. Bhd, Khairoul Nazim.

Antara aktiviti yang dianjurkan sepanjang Program Kesedaran Kecerdasan Buatan (AI) UMPSA 2024 adalah AI Mini Carnival FTKA '24, UMPSA Karnival STEMbot AI WEEK 2024, Pertandingan Ekspo Inovasi Perkomputeran Peringkat Antarabangsa (Ice-Cinno 2024), Bengkel Etika dan Aplikasi Asas Kecerdasan Buatan dalam Penyelidikan Sains Kemanusiaan dan Sains Sosial serta Pertandingan Kreativiti AI 2024: Seni Dalam Era Sains, Teknologi dan Inovasi (STI).

**Disediakan Oleh: Naqiah Puaad, Pusat Komunikasi Korporat**

TAGS / KEYWORDS

[Program Kesedaran Teknologi Kecerdasan Buatan](#)